

Cu acto protocolar y actividad cultural

Comunidad Dominicano lo celebra e di 172 aniversario di independencia di nan pais



ORANJESTAD - Comunidad Dominicano na Aruba ta preparando pa conmemora e di 172 aniversario di independisa di nan pais. Ayera presidente di fundacion Dominicano Arubaanse Juan Pablo Duarte, sr. Winston Tavarez a declara na Bon Dia Aruba cu e conmemo-

racion aki lo cuminsa riba diasabra 27 di februari pa 10'or di mainta cu un acto protocolar riba plasa Juan Pablo Duarte na altura di hospital bieu.

E acto oficial aki ta wordo organisa pa Consulado di Republica Dominicana conhuntamente cu e fundacion

mentiona. E mesun dia aki pa oranan di anochi tin un actividad social na Centro di Bario Playa Pabao.

Sr. Tavarez a informa cu e fundacion Juan Pablo Duarte ta organisando otro actividad cultural den cuadro di dia di independencia di Republica Dominicana na Riu Hotel. E actividad aki lo tuma lugha dia 28 di februari proximo entre 6'or atardi y 9'or anochi den Salon Oranjestad di e hotel menciona.

Presidente di fundacion Dominicano Arubanse Juan Pablo Duarte a laga sa cu e actividad aki ta gratis ya cu nan no ta bay cobra pa celebra dia di independencia di nan pais. Sinembargo el a bisa cu e fundacion aki cu ta realisa hopi accion humanitario tin su reto financiero pa atende cun'e y tur contribucion bo-

luntario fei e miembronan ta mas cu bon bini. E lo yuda pa crea un fondo pa atende cu e gastonan.

Actividad cultural

Sr. Tavarez a bisa cu e actividad di dia 28 di februari na Riu Hotel lo ta uno exclusivamente cultural y folklorico, ya cu e ta un celebracion di integracion caminda tur hende ta cordialmente bon bini. Nan ta solicita pa tur esunnan interesa di bay, please haci nan reservacion (tel. 582 5890). E lo bira un anochi placentero cu musica, entretenimento, show dor di grupo "Ramona Folkorico", Rosea Cultural, grupo local di Bachata, etc... E fundacion aki a yega di organisa den pasado e tipo di actividad cultural aki na aña 2013 y despues di tres aña nan a dicidi di organisa esey atrobe. Tambe lo



tin invitadonan special como e Consul Dominicano, Lic Joselyn Rosario de Rosa cu lo hiba palabra.

Di otro banda sr. Tavarez ta informa cu e curso di Papiamento organisa pa e fundacion a cuminsa caba y e ta bayendo "super bon". E ta tumando lugha tur dialuna di 7'or pa 9'or anochi den e sede di e mesun fundacion situa dilanti plaza Dominicano Juan Pablo Duarte. □